

摘藻堂四庫全書薈要

集部

欽定四庫全書薈要

集部

于湖集卷一至四

詳校官助教臣謝登雋



欽定四庫全書薈要

于湖集目錄

卷一

賦辭頌樂章

卷二

古詩

卷三

古詩

卷四

古詩

卷五

古詩

卷六

律詩

卷七

律詩

卷八

律詩

卷九

律詩

卷十

絕句

卷十一

絕句



卷十二

絕句

卷十三

文記

卷十四

記

卷十五

序
銘
說
贊

卷十六

奏議

卷十七

奏議

卷十八

奏議

卷十九

內制
外制

卷二十

表

卷二十一

啟

卷二十二

啟

卷二十三

啟

卷二十四

書

卷二十五

疏文 青詞 釋語

卷二十六

釋語

卷二十七

祝文 致語

卷二十八

定書 題跋

卷二十九

墓誌

卷三十

墓誌 祭文

卷三十一

樂府

卷三十二

樂府

卷三十三

樂府

卷三十四

樂府

卷三十五

尺牘

卷三十六

尺牘

卷三十七

尺牘

卷三十八

尺牘

卷三十九

尺牘

卷四十

尺牘

臣等謹案于湖集四十卷宋張孝祥撰賦詩
十二卷文十八卷詞四卷尺牘六卷首有門
人謝堯仁弟華文閣直學士孝伯序孝祥字
安國厯陽人紹興甲戌廷試第一官至顯謨
閣直學士每作詩文輒問門人視東坡何如
而堯仁謂其水車詩活脫似東坡然較蘇氏

畫佛入滅次韻水官韓幹畫馬等數篇尚有
一二分劣又謂以先生筆勢讀書不十年吞
東坡有餘矣今觀集中諸作邊幅差狹筆力
亦未舒卷自如以視蘇氏之萬斛源泉尚不
免厯塊而蹶然其縱橫排蕩才氣實俊邁可
喜究去蘇氏為近其自負亦有由也乾隆四
十二年三月恭校上

總纂官臣紀昀臣陸錫熊臣孫士毅

總校官臣陸費墀

于湖集原序

文章有以天才勝有以人力勝出於人者可勉也出於
天者不可強也今觀賈誼司馬遷李太白韓文公蘇東
坡此數人皆以天才勝如神龍之夭矯天馬之奔軼得
躡其蹤而追其駕惟其才力難局於小用是以亦時有
踈略簡易之處然善觀其文者舉其大而遺其細可也
若乃柳子厚專下刻深工夫黃山谷陳後山專寓深遠
趣味以至唐末諸詩人雕肝琢肺求工於一言一字間

在於人力固可以無恨而槩之前數公縱橫馳騁之才則又有間矣故曰人可勉也天不可強也于湖先生天人也其文章如大海之起濤瀾泰山之騰雲氣倏散倏聚倏明倏暗雖千變萬化未易詰其端而尋其所窮然從其大者目之是亦以天才勝者也故觀先生之文者亦但當取其轆轤幹旋之大用而不在於苛責於纖末瑣碎之微先生氣吞百代而中猶未慊蓋尚有凌轢坡仙之意其帥長沙也一日有送至水車詩石本掛在書

室特攜堯仁就觀因問曰此詩可及何人不得佞我堯仁
時窘於急卒不容有不盡因直告曰此活脫是東坡詩
力亦真與相敵但蘇家父子更有畫佛入滅次韻水官
贈眼醫韓幹畫馬等數篇此詩相去却尚有一二分之
劣爾先生大然堯仁之言是時先生詩文與東坡相先
後者已十之六七而樂府之作雖但得於一時燕笑咳
唾之頃而先生之習次筆力皆在焉今人皆以爲勝東
坡但先生當時意尚未能自肯因又問堯仁曰使某更

讀書十年何如堯仁對曰他人雖更讀百世書尚未必
夢見東坡但以先生來勢如此之可畏度亦不消十年
吞此老有餘矣次年公自江陵得祠東下方欲踐此言
未幾則已聞為馭風騎氣之舉矣嗚呼天不竟英雄之
志尚留莒墨兩城與太原餘蘖至今江流尚覺有不平
其以此歟天下刊先生文集者有數處豫章爲四通五
達之衝先是先生之子同之將漕於此蓋其責也時侍
郎莆陽蔡公屢勸之而竟不果信知斯文通塞亦自有

時今閣學尚書公自其開府以來即曉夕在念而尚
乃遲遲至於今者豈不以先公後私於事自有次第而
不知此事亦公也蓋四方學者渴見斯文以增壯筆端
方皆以先覩為快使公肯為是舉正加惠學者之意豈
必獨認為激乎鵠原之情而足以有歉哉自渡江以
來將近百年唯先生文章翰墨為當代獨步而此猶先
生之餘事也蓋先生之雄畧遠志其欲掃開河洛之氛
浸盪洙泗之羶腥者未嘗一日而忘胷中使其得在經

綸之地驅馳之役則周公瑾謝幼度之風流其尚可挹
於千百載之上也而門下之鯁生何足容議論之喙哉
嘉泰改元之中秋門下士昭武謝堯仁序

于湖先生長孝伯五歲垂髫奉書追隨未嘗一日相捨
別去餘十年先生再冠賢書會於臨安時紹興癸酉也
明年魁多士又明年入館寢登清華孝伯亦入太學為
諸生無時不在左右每見於詩於文於四六未嘗屬稿
和鈎舒紙一筆寫就心手相得勢若風雨孝伯從旁抄

寫輒笑謂曰錄此何為間從手掣去良繇天才超絕得之游戲意若不欲專以文字為事業者一日謂孝伯曰汝作一月工夫我只消一日明日便有用處夫所謂用者豈章句而已哉惜乎天奪之速不容究其才於用大僅能遺愛於六州恭聞孝宗皇帝玉音嘗興用才不盡之歎使其適乘機會必有以上契聖心則其成就蓋不止此嗚呼大丈夫有志當世孰不以功名自許至如先生真有過人者歟別後詩文多得之耳授然不能無舛

也。竭南昌解后王大成集大成從先生久先生深愛之者盡以家藏與諸家所刊屬其讐校雖不敢謂全書然視他本則有間矣繼有所得當為後集云嘉泰元年十月旦弟華文閣直學士朝請大夫知隆興府充江南西路安撫使孝伯謹書

欽定四庫全書薈要卷一萬五千七百十一

集部

于湖集卷一

宋 張孝祥 撰

賦

金沙堆

洞庭之野吞楚七澤乘秋而霽天水一色登高桅以掛
席兮揜余舟之兩翼凌長風以破浪兮駛掀舞於一葉
橫中流而北望兮何黃金之突兀觸白日以騰耀兮疑
波神之汎宅舟人告余曰此金沙堆也壁立千仞衡亘

百步靈鼇之背孤起以自暴兮棄方丈而不負湧青城

之玉局兮遲虛皇

一本作靈皇

而來下太倉露積以弗校兮

白粲粲而非腐熬海波以出素兮葦既多而無數胡山
十丈之雪結而不復釋兮吳江八月之潮來而不復去
諒非目見而心識兮雖巧譬其馬喻客有嘆曰墜土為
城隱以金椎一雨之暴或傾以摧之今此沙也質輕而
性離得水而走得風而飛澶漫乎大漠之北飄流乎崑
丘之西曷稽天之巨浸兮獨與此而相宜廉隅峻以特

起兮若斗之覆而四維潦盡不為之高兮春既漲不為
之卑風揭石以拔木兮蛟鼉駕海而上馳捲近岸之丘
阜兮若烈火焚乎枯萁謂此沙既無有兮當散入於渺
瀰旦起而視之兮曾無毫髮之或夷豈與息壤同生兮
為上帝之所私將富媪之多藏兮萬寶萃而在茲豈女
媧五色之石兮完天漏之所遺將神禹治水兮聚九野
之土以補東南之虧豈劫火之灰兮歲既久而莫移將
神龍之攸居兮百鬼夜築而守之徵至理而莫得兮願

先生之予思也張子笑之曰子來前天地之間何所不
有遠者莫諱近或可取今夫積水為冰及春而澌此物
之常理也然凌人氏乃得而藏之堅其土使地氣無所
洩厚其覆使天氣不得下天且暑矣於是方謹而獻之
夫以一人之私猶能變易陰陽之度而況天地之大乎
沙之積不積流不流安所置論子行矣

辭

攻蚊

后皇嘉生物有羣此強者熊虎弱羔殞此畜我遠我區
以分此各保性命不相紛此爾獨何化以為蚊此匪強
匪弱孰使云此廉纖么麼毒所熏此利喙短翼飛翁翁
此羸腹曲脚豹成文此藏陰伏翳須日曛此微類嘯族
乘惡氛此渙散揮霍絲之棼此緣頭撲臂來如雲此入
隙伺罅霰雪零此伊伊湍湍相懽忻此嗜膚吮血飽以
醺此前捷甫去後亦厯此無可柰何夕及昕此引鏡自
照面纈紋此客或告我祈火君此彼嗜臭惡憎芳芬此

謀野則獲采蕭薰此載暴載熱烟網緼此儻不退聽秉
烈焚此如彼即墨穢燕軍此焦腸爛腹翅羽旣此舉徒
盡殪永不聞此涼宵大枕奏厥勲此豈其不仁我則懂
此當斷不斷露汝筋此

祭金沙堆廟

憺九秋之半兮絕洞庭予將歸登磊石以遐矚兮天水
莽而相圍鯨波浩其呼洶兮蛟鰐擇食以自肥盲風憑
怒無時期兮橫中流吾馬依舟人諗余以湖君之神靈

兮曰甚仁而又威若著龜之可信兮盍潔齊而致祈嗟
余禱之既久兮豈夫神今日之我違晨光杲其東升兮
破積霧之霏微凝秋霽之萬頃兮檣烏轉而北飛棹夫
集合以奏功兮若駟馬熟路而駢駢寄千里於一瞬息
兮才舉手而一揮如靈宮以午泊兮目眩積沙之輝隨
濤波以上下兮爰金城之巍巍信真仙之攸宅兮羌見
間之所稀粉牆行樹繚以直兮鋪首鳴其朱扉儼帝服
之中居兮亦班寵於厥妃來牲酒之雜遝兮紛滿堂之

芳菲懷沙大夫之侑食兮噫孰知其是非鳥喙魚服沙
鰭鯀鯉睢盱以列侍兮駭怪譎之裳衣蓋專制楚之七
澤兮實參握乎天威者也由余役之既久兮闕水菽於
庭闡瞻白雲以延望兮朝濟至乎夕暉苟利涉以遄達
兮豈妄福之敢希感神貺余以獨厚兮銘肺一本作膺而
三歎跪陳辭而侑觴兮聊彷彿其音徽

頌

壽芝頌代揔得居士上鄭漕

并序時年十九作

上既專任一德方內底定眷江之北昔為戰墟生聚教訓十年於茲矣曰疇予寶臣持節以豈弟德惠為予撫綏之百辟卿士再拜言漕江東臣某再考績為天下最宜可上曰俞哉於是有詔華原增秩揔部淮南十有六州詔下之日淮民歡呼奔走相告自州達之縣自縣達之田里自田里達之窮巖幽谷公江東之治仁聲義氣漸被於兩淮故淮民間公之來其喜如此越翌日歷陽郡東鄙樵民有得異草於松根者郡人張某實公門下

士屬公誕辰甫及當有頌詩形容盛德迺以九月吉旦
潔齊執筆為文未有緒俯而假寐若有告者曰姑置之
天將以芝畀女為公壽某驚悟已而樵民奉芝款門曰
疇昔獲此弗之識而神夢謂余是蓋所謂芝者天以華
原公將持節吾土是生靈物而為瑞且此月之十日則
公生之日是芝則又昭示公難老之徵若里人有張氏
者實公客亟歸之俾得獻公不者禍女神言如是我懼
是以來某亦解昨者假寐若告之言盛服再拜而受之

信芝也一本二幹高廣有咫堅密溫潤色如紫玉輪囷
翦鬱駢為七枝華葉敷芳則十有四藹然若卿雲捧日
燦然若奇葩豔春噫戲異哉未曾有也神之命公可謂
深切著明矣不知天之於人相去遠近而其物類之感
召如是其敏且速耶且以公將持節西州而為呈瑞則
胡不降甘露流醴泉異畝同穎鳳凰翔集耶不以是數
者為應而應以芝天意若曰芝上瑞也不春而華不秋
而實不根而植翦而置之雖歷數千百年而猶敷腴充

實則芝非特上瑞又壽草也天與公瑞則於除命之後
瑞草發於淮西之境天與公壽則生朝之前壽草產於
古松之下物像昭顯決非偶然者鄉惟甘露醴泉嘉禾
翔鳳之來謂之祥瑞則可矣烏在其為壽徵也於以見
天之錫公富貴壽考廣大繁昌有永無極豈兩淮之民
獨受其福將天下生靈實受其福豈公獨有其瑞將朝
廷國家實有其瑞然則此芝之來所繫大矣哉謹拜手
稽首而為之頌曰

濯濯靈芝施于古松天錫珍祥以壽鄭公文武鄭公其
德孔碩文正之子柔嘉維則天子命公汝予寶臣宣力
四方其牖我民公拜稽首奉天子命自西徂東惟一其
政孰寒而飢公衣食之孰癘而疵公藥治之孰獷不率
則訓則治孰姦賊民則耨則夷條踈節披罔亦不宜天
子命公汝有成績盍其歸矣箴補衮職淮堧奕奕其疆
千里奠國北門孰與予理在列咸咨曰公克任天子命
公輟女往鎮公來之初靈芝則生亦以壽公寵錫百朋

蔚彼芝矣厥生孔時爰發其祥以公來綏蔚彼芝矣公
介眉壽數百千祀與國長久神則有言芝以瑞公入侍
帝旁九旒升龍神則有言芝以壽公楚南春秋綠髮方
瞳我作頌詩式詔罔極誕保休徵有永無斁

樂章

降神

於神何司而德於木肅然顧歆則我斯福我祀孔時我
心載祗匪我之私神來不來

又

神兮焉居神在震方仁以為宅秉天之陽神之來矣道
脩以阻望神未來使我心苦

又

神在途矣習習以風百君後先敢一不恭奔走癘疫祓
除蓄凶顧瞻下方消搖從容

又

溫然仁矣熙然春矣龍駕帝服穆將臨矣我酒清矣我

有烝矣我樂備矣我神顧矣

升降壇

在國之東有壇崇成節以和樂式降式登潔我珮服璆琳鏘鳴匪壇斯高曷妥厥靈

青帝位奠幣

物物熙熙胡為其然蒙神之休乃莫報旃有邸斯珪有量斯幣予以奠之格此精意

太昊位奠幣

卜歲之初我迎春旗孰克侑饗曰古宓戲於皇

後闕

于湖集卷一

欽定四庫全書薈要卷一萬五千七百十二

集部

于湖集卷二

宋 張孝祥 撰

古詩

和何子應賦不欺室韻

隆興天子開千齡六龍飛天動潛鱗東嘉先生初召對
不欺之論驚廷臣誰令浮雲蔽白日脫幘歸來環堵室
巍巍烏府憶霜簡凜凜螭坳有椽筆魏公眼力無餘子
與公周旋豈其死請公細讀不欺銘一字之褒如魯史

讀中興碑

繡紉兒啼思塞酥重牀燎香驅羣胡阿環錦鞵無尋處
一夜驚眠搖帳柱朔方天子神為謀三郎歸來長慶樓
樓前拜舞作奇崇中興之功不贖罪日光玉潔十丈碑
蛟龍蟠拏與天齊北望神皋雙淚落祇今何人老文學
題張仲欽所藏隆茂宗畫登瀛圖

老隆已死畫筆枯畫歸天上人間無公從何處得此圖
眼明嶺海三歎吁天策上將天為徒指揮羣龍清八區

褒鄂英衛供掃除功成告廟金模糊歌童舞女不願渠
乃此數士相為娛鐵面苦口談詩書直欲措世如唐虞
老隆妙手神所摹蒼頭廬兒亦敷腴祝公歸直承明廬
願持此道補帝裾

題蔡濟忠所摹御府來帖

生前官職但執戟身後一字萬金直當時雷霆下收拾
世間不復有遺逸上清虛皇手自擇編星為囊雲作笈
流鈴擲火守護密君從何處見真跡知君定通玉帝籍

太微垣中賜餘墨龍騰虎卧摹不得想君神授五色筆
江南鈎鎖腕中力釵拆屋漏千態出整整十卷字猶濕
光彩激射海為立平生我亦有書癖對此懽悅心若失
口吐汗下屢太息十日把玩不得食作牋天公拜稽首
乞我此老生時一雙手為君痛飲百斛酒墨池如江筆
如帚一掃萬字不停肘

賦王唐卿廬山所得靈壁石

湘江竹深韶不傳后夔神禹飛上天泗濱之磬無人編

帝敕此寶淪深淵於乎不知幾千年奇形異質鬼所鑄
青虬赤虎遭縛纏蹙筋怒爪身孿拳自從戰塵障中原
神物變化隨霏煙金聲玉振義不辱六丁徙置匡廬巔
靈臺星官未知處但恠寶氣干霄躔王郎齋居專淺原
飲水泣血天所憐空山無人下羣仙似夢非夢或告旃
捫蘿獨上果有得失喜而懼心茫然百夫挽取自包裹
解衣更買蠻兒氊緘扃不肖鄉人說知我好古容觀瞻
焚香再拜屢歎息安得致之天子前安得致之天子前

明堂郊丘備宮縣調和正聲薦上帝簫勺羣慝收戈鉞
朝廷清明用耆哲一律四海歸陶甄鳳凰來儀獸率舞
復古却到虞韶邊是時賦公筆如椽擘牋為草登歌篇
月之四日至南陵大雨江邊之圩已有沒者入

鄱陽境中山田乃以無雨為病偶成一章呈

王龜齡

圩田雨多水拍拍山田政作龜兆拆兩般種田一般苦
一處祈晴一祈雨去年水大高田熟低田不收一粒穀

只今萬錢糴一斛浙西排門煮稀粥聖神天子如堯湯
曰雨而雨暘而暘天公廣大豈有意爾自作孽非天殃
近得一二硯示范達甫笑以為堪支牀也許送

端州大硯作詩以堅其約

范郎紫玉餘半圭翻手作雲雨電隨龍蛇起陸孔翠飛
雲收雨霽千首詩薦以文錦盤珠璣夜光發屋隣翁知
桂州刺史書成癡單車萬里日夜馳囊中已無去年錐
欠此石友相娛嬉范郎笑我支牀龜忽遣致我重寶齋

金印如斗不願攜愛此直欲忘朝飢君行題輿古端溪
溪石醜好紛不齊溪邊之人足謾欺須君眼力為辨之
更作萬斛之墨池為君大書十丈碑

劉倅示崇寧上舍題名翰林其父也

崇寧天子開皇極發揮神謨詔羣辟十八學士天與力
攀鱗附鳳才一日翰林尚書古遺直不作三公奄宅安
當時盛事刊樂石後五十年已今昔令我再拜三嘆息
尚有之子似世德不羸其躬且赫奕

黃升卿送棕鞋

編棕織蒲繩作底輕涼堅密穩稱趾帝庭無復夢絲絢
上客還同貺珠履我家江南山水窟日日行山勞屐齒
感君投贈欲別時布韞青鞋從此始亨衢知子方着脚
直上青霄三萬里泰階歷盡却歸來赤舄一雙應几几
贈張欽夫

張家承平四姓侯門前列戟金成丘南來清貧家立壁
但有萬卷書滿樓雲山極觀半空寫下有花竹秀而野

閉門讀易已三年樂知天命忘華顛我行湘中識此老
難兄莫年更枯槁從來戚晚須表勸曾聽鳴珂趨朝早
衡陽小隱雖深幽去天尺五君無留貂蟬堯鑒何足道
君必不為猿鶴羞

賦沈商卿硯

石渠東觀天尺五壁星下直圖書府琳琅寶鎮出三代
浩瀚簡編照千古右文儲硯一百九鈿匣珠囊護瓊玖
有時清夜發光怪諸儒縱觀容拜手一收朝蹟歸故園

瓦池葦管塗哭煙夢尋清都故歷歷起凭書按空潛然
眼明見此超萬石色如馬肝涵玉質白圭之玷尚可磨
澁不拒筆滑留墨摩挲太息不自已呼兒汲甘為湔洗
天遺至寶瑞吾子要與詞林壯根柢子行飛騫為時須
西清承明有佳除收功翰墨儻乞我田間自抄種樹書
大雨呈同行諸公

我舡千斛初甚遲上灘下灘風薄之百夫撐挽才得過
水淺舟大行無期同來賓客笑鈍滯一葉自買如鳬鷖

瞥波急槩亂藻荇瞬息不見颿車馳忽然昨夜雷雨作
黑雲頽山風卷壑龍門春漲魚鼈亂牛渚宵明鬼神惡
蓬翻纜斷泊不得客只一身無處着長年絕叫客驚起
一浪先掀半舡水囊衣漂盡到巾屨一夜奔忙沙石裏
我時甘寢殊不覺但怪颼颼風到耳起來呼酒自勞苦
水滿涼生差可喜鄉來笑者今却悲人生淹速那能知
明朝轉柁我舡快喚客同舡莫嫌隘

吳城阻風

吳城山頭三日風白浪如屋雲埋空北來大舸氣勢雄
車帆打鼓聲聶聶我舡政爾不得去跼促沙岸如鳧翁
長年三老屢彈指六月何曾北風起由來官儂多齟齬
世不汝諧神亦爾我愧此言呼使前順風逆風皆偶然
皇天廣大豈有意想汝嗔喜庸非偏瓶中有粟囊有錢
與汝飽飯姑畱連

金沙堆

玻璃盆中金作堆藥房桂棟中天開洞庭無底蛟蜃惡

君不喚我那能來旁舡守風四十日我行昨夜到磊石
山頭望君乞杯琰僮僕歡呼得頭擲二更南風轉旗脚
打鼓開舡曉星落秋光淨洗八百里亭午投君廟前泊
斬牲釃酒報君德君今清都豈其食聊須醉飽撐舡僂
明日依舊行南風

欲雪

欲雪未雪天糝糊凍行沙尾鷓鴣呼北風刮耳立不住
更騎鈍馬穿枯蘆兩生憐我意不舒江頭三日占檣烏

高堂明朝置安輿買羊沽酒償勤渠

鑑湖納涼

鑑湖周圍三百里極目平波清到底荷花歲久生滿湖
人來採蓮唱歌起賀家千頃水雲鄉六月荷花風最涼
短楫輕舟來斷續山橫曉月正蒼蒼

和沈教授子壽賦雪三首

北風吹來燕山雪十萬王師方浴鐵風纏熊虎靈旗靜
凍合蛟龍寶刀折何人夜縛吳元濟我欲從之九原隔

東南固自王氣勝西北那憂陣雲結豈無祖逖去誓江
已有辛毗來仗節

又

今年米貴更風雪破屋荒涼冷於鐵道人三日不出門
卧聽欹簷竹枝折高吟忽送三十韻覲面未覺千里隔
此公也自可憐人家徒四壁衣鶉結君不見漢時蘇子
卿窖中齧氈終持節

又

天公作劇已三白刮面東風利如鐵只今斗米錢數百
更說流民心欲折北人打圍涂塘北煙火穹廬一江隔
陛下宵衣甚焦勞微臣私憂長鬱結爾曹忍凍不足說
我輩何時立奇節

鄱陽使君王龜齡閔雨再賦一首

老農歌舞手作拍一雨紛紛稻花拆去年秋田旱政苦
使君隨車有甘雨旁州不熟我州熟至今中家有藏穀
地碓舂秬珠滿斛老農左餐仍右粥使君行矣伊佐湯

緝熙和氣無常暘豈徒一雨潤九穀要為萬物除千殃
喜晴賦呈常守葉夢錫

使君憂民出至誠欲晴未晴天所矜白衣老人無逢迎
香火未收東方明指揮六龍扶日行羣陰卷盡見太清
女擷柔柔男趣耕熙熙和氣滿春城去年歲事已如許
田頭試聽老農語淞西更著五日雨麥根爛盡種不吐
七夕

去年永州逢七夕今年衡州逢七夕往來不敢怨道路

迎送但知慚吏卒年年七夕有定時我行屬天那得知
東西南北會逢汝但願強健無所苦

謝劉恭父玉潭月色真石室之賜

玉潭月色冽以清石室千里猶典刑何人遺我雙玉瓶
武夷先生翰林卿約束風雨驅雷霆長鯨夜吸川為傾
明朝風止醉不醒扁舟徑度君山青

從張欽夫覓紙

蜀江擣麻色勝玉百金才能致一幅君家入則充棟宇

再拜未肯乞纖粟為君破慳作此詩擔囊揭篋應有時
比鄰寒已忌唇齒君但勤渠送川紙

幽興

海涵大陰日西墜畫角一聲城欲閉柴門闕上濯足眠
萬事不如高枕睡睡鄉廣大能我容兀兀騰騰興莫窮
推枕起瞻河漢曉月明庭竹響清風

于湖集卷二

欽定四庫全書薈要卷一萬五千七百十三

集部

于湖集卷三

宋 張孝祥 撰

古詩

麒麟硯滴分韻得文字

素王西狩麟筆削昌斯文茂陵一角獸妙語聞終軍壯
哉筆硯間英姿欲拏雲名參龜龍瑞威掃狐兔羣豈獨
濡毫端政爾清妖氛會當獻君王玉殿春夜分輸寫曾
中奇恩波被無垠

諸公同集客廬清談之暇拈韻紀事余分得老

庭字

橫梁能賦詩下馬具檄草忠義乃天賦勲名要時早龍
卧南陽客鷹揚渭濱老當其尚棲遲衆或輕潦倒風雲
會相遇氛祲當獨掃鳳凰翔千仞駕馬顧棧阜士為一
飽謀懸知不同道

又

吳甲組練明吳鉤瑩青萍戰士三百萬猛將森列星揮

戈却白日飲渴枯滄溟如何兵革起敢來干大刑嗚呼
三十年中原戰血腥陛下極涵容宗祊甚威靈羣生爾
何知避難心未寧囊血規射天蒼蠅混驚霆猛士不畏
死榆關不須扃彼勢看破竹我師真建瓴便當收咸陽
政爾空朔庭明堂朝玉帛劒佩鳴東丁八章車攻詩十
丈燕然銘我學益荒落尚可寫

一本
作紀汗青

椰子酒榼

矮壺生南方託家碧山崖採擇供貢篚扶持上天街愧

此愿慙姿欲售久未諧道傍麴先生風味故自佳逢渠
即傾蓋輸寫能開懷刮削出光彩規繩去欹佝金玉豈
足貴膠漆真吾儕客來有嘉招二士往必偕婆娑止坐
隅供饋煩金釵矮壺雖木強醇德真無涯虛心實其腹
居然外形骸微物幸見用棄置理則乖毛穎有封國陶
匏薦欽柴大藥起世痾炮燔及根莠願子自洗濯勿受
塵埃埋暇日宵相從醉經坐高齋

赭山分韻得成葉字

昨日一尺雪今朝十分晴
杲日上積雪光若虹氣升江
平鏡新磨地迥玉琢成赭山
有令色令我白眼青借馬
屋東家喚客踏層冰冒貂挾
裘茸石路五里平竹樹紛
掩冉珠幢間霓旌野僧不慣
客倉皇門前迎屋古少完
壁堂虛有危登石上迹宛宛
山腰塔亭亭劫火偶不燒
百年費支撐我有一尊酒高
處得細傾諒非無事飲憂
國空含情長歌眇寥廓歸路
已戴星

又

萬生紛不同宿昔有定業哀哉彼遷民苦事乃稠疊累
累庭際炊采采澗底葉問渠胡為來悲淚不盈睫連年
避兵亂生理安可說今年更倉皇芻藁亦焚劫扶持過
江南十口四五活斗米六百錢兼旬又風雪前時詔書
下振廩要周浹聖主甚哀矜我曹空感咽願今兵革罷
復得理歸楫傳聞菰蒲中相殺血新喋本是耕田農飢
寒實毆脅須公語縣吏早與支米帖

重入昭亭賦二十韻

我本山中人對山輒忻然蹉跎落世網欲去常拘牽蒼
鷹着珠鞬側腦思高騫青絲絡奔驥擺脫意乃便抑鬱
不自聊沉冥向誰宣長懷昭亭山積翠摩青天下有千
柱宮突兀數百年往者雪中游羣峯玉回旋飛閣出木
末下睨春無邊堂中二老人龍象開法筵炯炯月在空
浩浩海納川應庵默無言妙處心已傳如庵說千偈微
辭諦真詮靜極炷爐熏對床且安眠更欲捐冠簪一簞
寄三椽此志意不遂緇塵亂歸鞿今朝復何朝却望山

中煙縹緲見樓觀鍾梵聲清圓我携九節筇飛步雲蘿
巔

登馬氏永寧閣和朱漕元順分韻

佛宮昔誰營猶挾盖世氣應慚割據醜稍識苦空味重
簷隱白日隆棟湧金地耿耿壁間像尚可將千騎鄉來
歌舞處荒棘擁城雉惟此悲願成歷劫更興起橫撞鍾
萬石妙響警昏醉憶當風雪辰茲事實經始老僧喜成
就膜拜顙有泚喚客饌伊蒲齋房頗深邃空巖才跬步

不往獨何謂徑携雙竹杖脚力勇難制繡衣兩使者風
誼我所畏相逢瘴海上此樂豈天惠山林與心會風月
可回施聊乘簿書隙拚此一日費摩挲水邊石勝處欲
專美不用濡漆書公詩即行記

再用韻呈仲欽元順

今時朱仲欽文字有奇氣潜幽覩天奧雋永得古味袖
手閱世紛虛心餘樂地那持瘴野節不從羽林騎埋輪
吾宗英補袞五色雉去年對延英御坐再三起憂民甚

已溺稽古乃心醉天衢行日月發軔從此始會當紀鴻
業我筆墨先泚相期並徵詔禁殿直清邃尚憶此追游
班中語相謂我懷江湖去初服反芟制閑邊靜成趣岐
路險多畏此事屬兩君它年儻終惠長篇起予病妙語
充法施調高和難工初學慚紙費郊原春無數風日極
清美已遣具方舟重游更須記

贈江清卿

吾友林少穎讀書不計屋抄書手生繭照書眼如燭往

時羣玉府上直對床宿夜半聞吾伊我睡已再熟此君
抱高節雪柏映霜竹造物乃兒戲卧病在空谷尚能作
手書寄我成一束我懶更愧渠終歲不報復今來見江
子少穎儼在目不必不如師惟子肖甚速持身嚴法律
自愛比冰玉學官冷徹骨三月食無肉危坐談仁義口
吻若布穀時能從我游騎馬踏溪淥定自我輩人胃次
不碌碌惟皇開洪業大厦非一木豈有梁棟姿而令久
淹辱願子益寵珍即日馬首北我懷山林去掃迹混樵

牧躬耕得薄少持用供水菽稍遠聲利場真勝萬鍾祿
但恨與子別醉語成諄復因書寄少穎以寫我心曲

和蔡濟忠天字韻

憶我初識君屈指今七年鹽車著騏驥駕蹇紛爭先謂
當對清閑帝席半夜前稍使修世官復近尺五天如何
尚朱紱亦墮嶺海邊前山春色多佳樹午陰圓散策履
幽徑方舟下長川心目得開明語笑為芳鮮但恨暝色
至不得窮攀援尚欲夜然犀下照蛟龍淵清遊渺難繼

歸夢蒼山巔須君換鵝帖更叙山陰賢

考試呈周茂振舍人陳季陵國正

胃中五斗棘厭此十日讀紛然湘羅帕猶作春筍束先
生擇法眼一閱不再復探囊得至寶每出輒驚俗孟公
更超絕涇渭飽渟滫從容了官事繭紙唾珠玉鄙夫聞
道晚衡鑑恐不足冥搜夜無寐慚愧費官燭何時即三
昧屈指社甕熟秋容日夕好應到堂前菊

和子雲白蓮

仙人玉步搖佛子白練衣新粧水底明素手風中揮盈
盈夜露光灩灩秋江肥寒月分好色朝霞借餘輝遙聞
功德水盡洗幻化非惟此妙花幢坐受諸天圍鄉來孤
山遊未覺所見稀零落塞草邊相逢故依依結實須及
早要令飽霜威采剝登君盤勿嫌此么微

與趙李二同年夜飲有懷石使君惠叔

佳月久不見忽見如故人清風何方來過我孤竹君我
有一尊酒政為二子斟會此風月宵更覺語笑新北城

石先生欲喚不敢頻坐上欠此客長懷渺無津南方鳳
之徒瑞世五色文鐵石賦梅花一洗瘴海氛臺家須貢
珍我欲列九閭且補諫官闕日酌白獸尊

金沙堆廟有曰忠潔侯者屈大夫也感之賦詩

伍君為濤頭妬婦名河津那知屈大夫亦作主水神我
識大夫公自托肺腑親獨醒梗羣昏聚臭醜一薰澀血
摧心肝懷裏如不聞已矣無柰何質之雲中君天門開
九重帝曰哀汝勤狹世非汝留賜汝班列真司命馳先

驅太一諏吉辰翩然乘回風脫迹此水濱朱宮紫貝闕
冠珮儼以珍宓妃與娥女脩潔充下陳至今幾千年玉
顏凜如新楚人殊不知謂公果沉淪年年作端午兒戲
公應嗔

詠雪

東皇携春來屬車載霓裳回風作妙舞雜珮鳴珠璫千
官玉笋班再拜稱瑤觴酒罷各分瑞圭琮粲琳琅浩蕩
涵濡恩一笑徧八荒塵垢得湔洗焦枯亦輝光偉哉造

化力天地為翁張功成了不居杲日天中央

題朱元順浯溪圖

去年過浯溪王事有期程夜半度湘水但見天上星平
生中興碑夢入紫翠屏已辨北歸時十日窮攀登今朝
復何朝忽此短軸橫歷歷眼中見湘山無數青白雲著
山腰樓閣秋氣明便欲扶短策下濯滄浪纓主人山水
仙妙處心自評元顏骨已冷千載交蓋傾賞音寄幅紙
益見忠孝情題詩亦公畫託我不朽名

寄題向彥績使君采菊堂

使君天資高風昔事幽屏長懷渺丘壑餘習謝鍾鼎東
籬義皇人槁死骨已冷淒其千載後妙處一笑領高堂
娛白髮兄弟極整整不須南陽泉壽與日月等

止酒

飲酒見真性此酒不可止一飲病三日止酒寧獲已飲
酒有別腸勸酒無惡意既因酒成病那識酒真味將軍
罵不敬次公醒而狂破面棖觸人不如持空觴人言我

止酒似是遣客計但使客常滿客醉我亦醉

于湖集卷三

欽定四庫全書薈要卷一萬五千七百十四

集部

于湖集卷四

宋 張孝祥 撰

古詩

昨日極暑今日極寒

昨日火流金今日風折膠昨着練布衣今衣弊縕袍赤
帝與玄冥凜凜隔一宵聊將擁爐適換此揮箠勞冰炭
欲盈懷炎涼不崇朝幻生過隙駒是身九牛毛等是一
寒暑胡為自談嘲萬法從心生心靜境亦消悟此本來

無絺綌同狐貂還當隱吾几試聽萬竅號

初得愛巖

高巖劃天門仄徑通乳穴隈堆青螺髻巔嶺白玉關外
有虎豹蹲中恐蛟蜃蟄東榮俯雷電西出挾日月萬壑
生悲風六月不知熱但覺駭心目未易紀筆舌平生山
水趣嶺海最奇絕洞府二十四未厭屐齒折晚乃得游
此餘地皆僕妾同來六七士嗜好頗相躡舉酒酌山神
慰汝久湮滅

與邵陽李守二子用東坡韻

兩李有佳句冰雪洒肺肝清越石在懸圓熟珠走盤我
家十二樓下俯千仞湍誰掣白玉瑣借與二子看臨風
度長遂瘴海為清寒卻立望九州隘陜非所安便欲馭
長鯨九萬扶搖搏神山在吾牖弱水空瀰漫回首五千
劫不費一指彈絕笑塵中年攝提與泥灘

奉送李彥國還廬陵

李生來嶺南自挾書一束食簞寄蕭寺吃吃晝夜讀餘

子讓頭角文作翻手速小試不盡能它日真可卜里中
老仙伯曾對玉堂宿高節老彌厲名蓋斗南北掖垣我
畏友不愛萬鍾祿卷藏一丘下勲業所迫逐子歸問道
要儲作飢歲穀富貴偶然耳吾欲子金玉

暑甚得雨與張文伯同登禪智寺

老火陵穉金聚作三日熱舟行湘江上蒸煮到魚鼈黑
雲起東北一震山石裂不知雨來處但見風卷葉銀河
倚天瀉高浪舞飛雪只聽打蓬聲已覺涼意愜岸傍古

佛屋樓殿頗嶄嶮不辭衝泥去一看雨脚闊吾宗紫巖
客窮苦志不懾自我來浯溪奔走已旬浹我懶久廢學
愧子來挈挈相携得偉觀為子熾然說願子領話頭吾
今指標月

丙戌七夕入衡陽境獨遊岸傍小寺

七年暑中行道路萬里賒今夕已七夕我猶在天涯繫
舡蒼石根人影散晚沙上岸是脩竹仄徑如行蛇茅屋
四五間往昔佛所家經禪劫火盡舊觀初萌芽墻疊古

瓦盆僧披破袈裟喜聞拄杖聲掃地自點茶何以為我
娛冰雪汲井花一洗十日渴分涼到童髻盈盈牛女期
不着雨洗車疎星銀漢動新月玉鉤斜更呼老奚官卷
蘆作鳴笳莫驚潭中龍聊起棲樹鷗

福嚴

丙戌七月

行行山益高所見益以奇煮茶南臺寺更上千級梯道
傍古時松閱世心已灰不與歲月競况受霜雪威路回
聞鐘聲寶刹隱翠微排空寓金碧剏石著棋枰門前兜

率橋劫火昔所遺神龍厭庠陋一炬然枯其談笑舊觀
還殿柱百尺圍老禪七十餘高與此山齊大屋貯龍象
空巖走金犀齋孟細細參至味無鹽醯頗聞三生藏中
有萬寶齋佛牙舍利湧貝葉旁行稀剖蚌慈相尊破匣
血縷飛稽首所願觀為洗往昔非卻尋上山路擬看浴
日池急雨忽留人吾其少須之

湖湘以竹車激水秔稻如雲書此能仁院壁

象龍喚不應竹龍起行雨聯綿十車輻伊軋百舟櫓轉

此大法輪救汝旱歲苦橫江鎖巨石濺瀑疊城鼓神機
日夜運甘澤高下普老農用不知瞬息了千畝抱孫帶
黃犢但看翠浪舞餘波及井臼春玉飲醑乳江吳誇七
蹋足蠶腰背僂此樂殊未知吾歸當教汝

贈黃司法

吾友黃升卿乃是天下士阿翁苦硬節御坐留諫紙辛
勤教其子不但為科第一官法曹掾整整老胥忌吾行
桂嶺南所得但吾子願渠自愛惜窮達初不計功名儻

來耳期子以千歲

宵征

畏暑倦長道呼童戒宵征三更渡前溪溪水清且鳴舟
人自相喚炬火如疎星俯視亂石多仰見北斗橫微微
白露下礫礫宿鳥驚竹輿出林薄十里月漸明光采散
草木涼意侵冠纓

汎湘江

十日行湘江湘水清而溫不療亭午渴却憶土井渾道

傍古剎竿着屋高樹根飛泉出山腹甘冷冰瓶盆何止
解百憂一洒塵埃昏設供者誰與稽首兩足尊

上封寺

七月十五夜我在祝融峯與世隔幾塵上天通九重手
取白玉盤納之朱陵宮羣山羅豆登萬籟酣笙鏞盡酌
五湖水勸我酒一鍾為君賦長言寫向西北風

一作為
君長言

謠寫向
東南風

岸傍偶得木犀

天公不求金富媼不復藏居然土同價散作草木芳英
英園中葵一心傾太陽采采籬下菊令汝壽命康惟此
木之犀更貯萬斛香雄姿傲霜雪鱗甲森青蒼三賢鼎
足立正色凜相望豈比桃李徒紅紫紛披昌聊息貪者
心來上君子堂歲晚從我遊寘汝兄弟行

王弱翁與余相遇漢口賦古意贈別

我舡行荆江厭此江水渾北風知人意引着清漢濱漢
濱有佳人心與漢水白涉江弄秋葉喚客踏明月明月

永相望佳人不可忘期君以千年珮我明珠璫

贈朱遠遊

遠遊何方來峩峩古衣冠袖中三百篇貯月白玉盤溪
清石瀨急雪凍銅壺乾有如山澤仙外瘠中氣完便合
朱絃彈細着青瑤刊懷哉人未識飛步江風寒

和張欽夫尋梅

寒梅本無心適與春風期孤根擢歲晚桃李更媚之取
我碧玉壺薦此白雪枝故人不可寄耿耿空自竒故人

隔湘江獨立知者稀
采香正滋蘭忍飢不食薇
拏舟許過我此約不可違
江南煙雨村願與子俱歸

黃龍侍者本高覓詩

高禪本儒冠誰令着伽黎
勞渠千里來贈我一卷詩句
法有源流人物乃清苦不用追
九僧政須越諸祖君家寒巖師
今代僧中龍持此送君行更去
問乃翁

題濁醪賦後

仇君在長沙未嘗出門養丹火
三十年不惜分人

屢起死又善釀山東酒李卿寶文所為賦濁醪也
此軸留余所半載其猶子洪自長沙來荊州求跋
乃書一詩併歸之幸呈似南軒先生或肯同作

仇公昔釣璜乃得丹竈術閉門養真火鑪甕釀新秣酒
熟分四鄰丹成活千人窮巷不改樂一室長如春我知
酒中仙歲晚當得度乘雲見東皇請誦濁醪賦

屢登橫舟欲賦不成阻風漢口迺追作寄趙富

文楊齊伯

已過漢陽岸却望橫舟山秀色挹不盡西風將夢還我
昔登橫舟最愛漢陽樹橫舟今不見樹色只如故公舟
在青冥我舟一浮萍闌干試拍手我亦同舉酒

棲真寄南康錢守

憶昔姑蘇臺實與君子別一別已六年音書間何闊我
行半天下塵土汙須髮君亦抱艱棘衣袂洒清血今日
復何日相望一山隔我領通玄府乃在廬山北君宦山
之南兵衛森畫戟無由接杯酒但可共明月作詩付郵

筒聊復寄消息

黃子餘自海昏見予於九江欲行為賦此詩

昔我初識君乃在潯陽城卻數已十年此地還見君積
雨楚水高落日淮山明我病不舉酒何以娛佳賓我行
不可留明復與君別悠悠千里情還當付明月

勸范東叔飲

今代太史公四海范氏門斯文十世澤斑斑被諸孫我
識叔西父白玉比粹溫今來見令弟俊氣百馬奔一第

溷子耳勿愧而家尊臨分無多言更酌老友盆

留題彭澤故縣修真觀

五月問修途今日一百里莫投彭澤縣愧此邑中士古
觀官道傍借榻暫少憇折腰向道士乞我五斗米聊為
奴僕飯明日更早起

一本作借榻容少休高林度清風似為客子謀

湘中館

雲去月在沙潦淨秋滿川北斗掛落木西風送歸船去
年過湘中夜半投馬鞭篝燈洗塵土所見只屋椽雞鳴

問前途殘夢兀擔肩那知闌干外有此山水妍微微清
露溥稍稍明河偏孤光耿自照靜極忻所便身世兩悠
然吾其遂飛仙

中隱

吾家中隱君才比萬斛泉短小精悍姿一劍當雄邊去
年郴州賊俯視衡嶽顛君從襄陽來孤忠作戈鋌談笑
百雉安淨洗湖嶺煙謂當疇王勲金印如斗懸言歸遽
如許此意誰為宣小隱即居山大隱即居廛夫君處其

中政爾當留連早晚有詔書喚君遠朝天欲為中隱遊
更著三十年

贈師永錫併簡子西丈潛

永錫西方來持論乃據正健飯不飲酒自詭作縣令我
已識淮父但未見伯渾林林三珠樹知是難弟昆上方
顧中原有君但無臣豈有千里足而令走跋跋願子徑
入關請對通明殿此事定在我不必問和戰

于湖集卷四

謹案卷二第五頁前六行贈張欽夫原本夫訛州

據本集改

第七頁後二行山頭望君乞杯琰原本杯訛杯據
演繁露改



總校官庶吉士臣張能照

校對官中書臣葉蘭

騰錄監生臣鄧培善

欽定四庫全書薈要

集部

于湖集卷五
九

詳校官助教臣謝登雋



欽定四庫全書薈要卷一萬五千七百十五

集部

于湖集卷五

宋 張孝祥 撰

古詩



萍鄉境上有驛傍有老杉餘百本余過而愛之
驛無名余名之曰愛直而為之詩又以告邑
大夫趙君公廩曰使繼自今為令者幸如君
之賢也則此杉長存不然將斧斤斯民以自
封植於杉何有

此杉已百年林立官道側鬼神所訶護斤斧不敢迫愛
此遺直姿凜凜有正色未云支大厦聊以蔭行客作詩
調令尹為我驛壁刻但使杉長存懸知令清白

遊千山觀

朝遊七星巖莫上千山觀東西兩奇絕勢略領海半長
江寫縑素疊嶂俯杯桮中有萬雉城鐵立不可玩伏龍
起行雨老樹舞影亂衝風挾驚電意恐崖谷斷路懸石
磴滑衆客紛駭汗嵌空偶自託發若鳥集灌須臾便開

霽杲日麗清漢卻坐山巔亭容我烏幘岸長懷付尊酒
別語不容判會須九垓外與子期汗漫

庚辰二月夜雪

夜半雨鳴廊晨起雪暗空不減臘月寒故作昨日風融
銀擁山腰飛花滿裘茸辦此了不難咳唾煩天工纖纖
園中花一夕無光容凜凜庭下松巍然兩蒼龍

張欽夫笋脯甚佳秘其方不以示人戲遣此詩
使君喜食笋脯味勝肉秘法不肯傳閉門課私僕君

不見金谷饌客本萍蓬豪世藉此真成癡但令長須日
致饋不敢求君帳下兒

蒙和答益奇輒復為謝

齋厨極蕭條晚食以當肉公來共蔬盤留語輒更僕平
生懲沸仍吹鑿欲了官事渠能癡何時竟作淮南歸擊
鮮校獵從盧兒

張欽夫送笋脯與方俱來復作

笋脯登吾盤可使食無肉鮭腥辟三舍棕枴乃臣僕書

生長有十甕
虀却笑虎頭骨
相癡得君新法也
大奇且復從游錦綳兒

勸農以湘波不動楚山碧
花壓闌干春晝長為韻得干字

積雨已連月
長沙尚春寒
今朝定何朝
喚客來江干
問訊湘西寺
霧重江漫漫
聊須萬斛舟
渡此千尺湍
老松如相迎
翠落頭上冠
却望城中花
寶髻垂珠鬢
勸農有故事
般樂非所安
薄晚會春園
老稚隨馬鞍
羣肩侑尊

酒呼喚來同盤從容及鄙事爾汝開心肝我是耕田夫
偶然此為官飽不知稼穡愧汝催租瘢願言各努力長
年好相看

陳仲思以太夫人高年奉祠便養卜居城東茅
屋數間澹如也移花種竹山林丘壑之勝湘
州所無食不足而樂有餘謂古之隱君子若
仲思者非耶乾道戊子六月某同張欽夫過
焉裴回彌日既莫而忘去欽夫欲專壑買鄰

欽夫有詩某次韻

平生交游中此士故耐久不折為米腰頗袖斲輪手卜
居並東郭草草宮一畝日課種樹書箋題偏窓牖花草
當姬妾松竹是朋友上堂娛偏親家飯隨野菽客至即
舉詩興來亦沽酒清溪遶屋角高木老未朽翻翻荷見
背戢戢魚駢首幽觀天所藏勝踐我獨後不因南軒君
茲遊幾時有為君便買鄰溪南好岡阜我喜君亦狂呼
兒挈尊卣一洒塵埃胃快若苗去莠夜涼佳月出人影

散箕斗恨我當先歸君能小留否

贈陳監廟

陳子居城東茆屋三四間下有五畝園灌畦泐清灣松
栢充羽葆荷芰作髻鬟再拜太夫人壽比衡麓慳我早
與子遊期子到孔顏察子意甚真不與時輩班扁舟漾
荆渚餘子頗謗訕大道甚坦夷勿歎行路難彼自種荆
棘吾寧翦榛菅一醉乘秋風共此霜月彎

送邵懷英分魯直詩韻人間風月不到處天上

玉堂森寶書得書字

將酒澆君車問君行何如初無十萬錢但有一束書往
昔千官班渠曾綴簪裾日月九門隔江湖十年餘老幹
久凌剝寒灰費吹噓今者尺一追問津承明廬蓬萊道
家山紫極帝所居功名儻來爾步武當徐徐遙岑出疎
林淺水行游魚臨分再三囑音信莫我踈

送張定叟

戊子歲二月定叟如南山行李太忽草問君何當還敬

展南陽阡永慕涕已潛畢事却登攬紆子悲悴顏羣峯
最高處眼界窮塵寰紫蓋款佛刹黃庭扣玄關夜榻藉
雲衲曉窓闔煙鬟野飯薦笋蕨幽尋翦榛菅酒賤可痛
飲詩成要重刪勿作賈胡留閨人賦刀環歸時買竹龜
小破行囊慳

朱陵洞

黑雲起我趾白雨過山脚卻立朱陵洞一望紫虛閣神
丹吾已必仙臂真可握試向靜處聽空濛有笙鶴

題屏風送裘甫歸臨川

不見已四年既見還作別贈以墨竹屏況此君子節歲月不我留玉立空山陰願言無相忘因風時寄音

送道州酒與吳伯承

陽城所臨州酒味猶清醇我病不能飲負此盎盎春髯吳燒苦笋喚客車連軫名酒隨惡詩掀髯一笑輟

葵軒觀笋

葵軒新笋生戢戢水蒼玉脫籜便林立爾輩殊窘束黃

梅四月雨念子亦良苦十二鳳凰鳴秋風何處聲

贈尹童子夢龍

長沙尹氏子四歲誦萬言青松一寸長歲晚當摩天終
為棟梁用莫作楠與椽斫根剗其明本瘁末亦顛持此
勸乃翁閉門養真源

一覽亭

城中十萬戶亭脚五千丈小退鴈鷺行却立雲雨上主
人心如此坐了鏡中像沙尾是我舡煙波更空曠

睡起

睡起有佳聲蕭蕭竹間雨
蒿廬澹無營一榻不受暑微
颼入牖來喚起香中縷撫卷忽超然空梁走饑鼠

吳伯承送苦笋消梅用來韻各賦一篇

問訊湘西笋政得夜來雨
高標諸枉直餘味良藥苦
天

脆圓供小摘不待四月雨
新詩同咀嚼學子心獨苦

戲書贈蘇待問

從公覓此紙欲與蘇待問醉中墨鷁黑北風起雲陣明
朝酒醒看為子傳心印子若不領略取火燒作燼

贈震山主

震公住山年與我共壬子瓦礫化金碧願力一彈指鄉
來祖師禪風定月滿天語子義第一饑餐困當眠

春盡日送聞人伯卿次家君韻

早年翰墨場未見心已親筆底三峽流曾次萬卷春

省試

文字適在某房

相從未淹時欲別故惱人敢賡老仙詩索去不

用頻

洗塵贈張立之判官

立之居糟丘曾有萬斛塵歸來卧西窓涇渭自此分
汙泥生笑渠榛墟有白雲莫厭吏事煩願子清天君

王龜齡賦喜雨諸賢畢和某客行半月未嘗晴
也故於末章云

久旱一雨足高低水平分老農爾何知使君甚艱勤使
君家鴈山出作無心雲四海方立槁須君來救焚

又

客行苦淫潦道路渺不分十步九掀淖眷言僕夫勤昔
早欲訟風今雨當誅雲我已寫綠章擬向清夜焚

八桂堂池上賞蓮納涼

山月半池白水風終夜涼蛙聲作鼓吹芰製為衣裳萬
里俱遠客三人同一觴但使嶺海豐此樂未渠央

前日出城苗獨立槁今日過興安境上田水灌
輸鬱然彌望有秋可必乃知賢者之政神速

如此輒寄呈交代仲欽秘閣

筒車無停輪木規著高格杭徐接新潤草木丐餘澤府
公為霖手號令行頃刻願持一勺水敬往壽南伯

南臺

我遊衡嶽巔路半此歇脚風雷駕飛殿日月隱傑閣闌
干十萬里仰視天一握遂訪紫虛君歸時騎白鶴

書懷

七夕在衡陽九日在蘄州秋風浩如海我行尚扁舟破

帽不堪落菊花空滿頭醉眼忽瞠若悠然過滄洲

元宵同張欽夫邵懷英分韻得紅旗字

佳月妬纖雲微和扇東風聊持一杯渌共此千燈紅
吾宗延閣英聖學與天通且最治郡課遂收活國功

又

邵子坐學官今日有詔追道山萃竹帛武庫森戈旗
文武要兩有腐儒不足為明年燕端門舉酒還相思

贈盧司法

逃秦盧博士讀書不讀律江陵法曹掾移病滿百日燕
坐供佛香青燈照繩床肺熱令無恙一本作門前春草
長

于湖集卷五